

如是不替則真靈玉女將懸子之寢矣卧覺

之時當正身上向叩齒三七通閉目微呪曰

上一赤子丹皇運珠太一帝尊凝天伯无七

靈上感五神歸遊靈童玉女露落雙符七星

同昇上登晨丘呪畢又叩齒三七通嚙液三

過閉目都畢此名為太一留神感會仙賢之

呪也如此者三年則九天諸神及太玄玉女

將降衛於兆身

凡道士入室齋戒有存修而數有不祥之物

及奇怪血光諸鬼精惡氣來恐試人者兆當

行此帝呪鬼殺邪神方先叩齒三十六通乃

呪之曰

二象迴傾玄一之旌七靈護命上詣三清雙

皇驅除赫栢羅兵三十萬人侍衛神營巨獸

百丈吐威攝精揮劍逐邪賊落魔靈神伯所

呪千妖滅形呪畢又叩齒三十六通此名為

此帝呪鬼殺邪神方諸神靈正氣聞此之呪

皆來奉衛於子而向不祥之氣得即死滅矣

雲笈七籤卷之四十六

雲笈七籤卷之四十七

攝七

秘要訣法

安魂魄呪

此法常經

紂絕標帝晨諒事構重阿炎如膏中煙救若

景耀華武城帶神鋒恬照吞青阿閻闔臨丹

井雲門營差我七非通奇蓋連宛亦敷魔六

天橫北道此是鬼神家急急如律令

著衣呪

旦起叩齒著衣呪曰

左青童玄靈右青童玉英冠帶我身輔祐我

形百邪奔散鬼賊摧精敢有犯我天地滅形

急急如律令

攝髮呪

凡欲攝髮先叩齒三通呪曰

上清朱雀不得動作勿離吾身勿受邪惡六

丁七星邪魔分形敢有當我此帝不侍急急

如律令畢閉目存想髮神蒼華字太元如嬰

兒之形在己髮上然後解攝之當令三五百

遍為佳然經中唯須一千五百遍畢成髮兩

手握固於膝上閉目微呪曰

泥九玄華保精長存左為隱月右為日根六

合清練百神受恩急急如律令

三洞奉道科曰凡梳頭先洗手而後梳之

皆不得使人見增壽八百二十

又凡梳頭髮及爪皆埋之勿投水火正爾拋

擲一則敬父母之遺體二則有鳥曰鵲鶴夜

入人家取其木髮則傷魄若能勤行增算六

百二十訖即入靖或殿堂朝禮便於寢卧之

處焚香左右叩齒二十四通存思如圖下床

躡履之際三稱大吉得所願微言言不可使

人聞却當存斗星在頭上斗合於頂指於前

聞和其心使虛靜恬然心動必思立功濟物

也

將卧之際焚香東西長跪叩齒三十六通誦

衛靈神呪曰

東方九氣青天明星大神煥照東方洞映九

門轉燭揚光掃穢除氛開明童子備衛我軒

收魔東妖上對帝君奉承正道亦書王文九

天符命攝龍驪傳普天安鎮我得飛仙

南方丹天三氣流光熒星轉燭洞照太陽上有赤精開明靈童總御火兵備守三宮斬邪東妖剪截魔王北帝所承風火八衝流鈴交煥靡有不從正道流行我專上功保天長存億劫無終

西方七炁之天太白流精光耀金門洞朗太冥中有素靈童守神安鎮衛我身形斷絕邪滯王道正明宮殿整肅三景齊并道合自然飛昇紫庭靈寶符命普惠萬生功加一切天地咸寧

北方玄天五氣徘徊辰星燦爛光耀太微黑靈尊神飛玄羽衣備衛五門檢精捕非敢有干試謠落斬摧玉符所告神真八威邪門閉塞正道明闕映照我身三光同輝策空駕浮舉形仙飛

中央黃中理氣總統玄真鎮星吐輝流煥九天閣光童子一十二人元氣陽精焰上朱煙洞照天下及得我身百邪摧落殺鬼萬千中山神呪普天使然五靈安鎮身飛上仙此呪攝五方五星真氣入人五藏中每經恐

畏之處及欲卧時面向東正立拱手叩齒三十六通誦之一徧欲卧時又存斗星依前橫在頭

洗手面神呪

凡道士浴身及洗手面時先臨水叩齒三通

呪曰

四大開朗天地為常玄水滌穢辟除不祥雙皇守門七真衛房靈津灌練萬氣混康內外利貞保茲黃裳車又叩齒三通乃洗手面浴身此名滌穢除凶七房呪法常能行之目明血滌辟諸凶氣

耳鳴呪

道士聞耳鳴呪出大有妙經中卷凡聞耳鳴者錯手掩耳祝曰

赤子在官九真在房講聽神命示察不祥太一流光以滅萬凶以手指捻耳門一七過畢雷覺面熱即佳候也若覺頭頭悶索寒者惡氣入也當急卧臨目存玄丹官太一真人以流火之鈴煥而擲之令惡氣即出身外光亦隨之在後炯炯然以照己身良久平復矣

審耳鳴吉凶法

凡耳中忽聞灘水雷電鼓鳴聲者是身中勞損心藏極不能味真注生而臨救喪亂便六府失攝魄衰魄號蓋將結疾致死亡之兆矣是以泥丸流縱九官失常悲憂錯亂鳴鼓亂行將欲寫其居館以棄一身也聞之者當精念不怠還專其心若罪未深者自聽改也所以耳鳴者神亡之故也耳中忽聞金聲玉音者真氣入道欲成也忽聞絃歌之聲者六丁玉女來衛子道也當隱靜專修所行勤至之心愈彌強也真人因是遂有形見之漸也自非爾師且勿言於他人也耳中聞蕭角之音吉貴象至也聞號呼之聲者凶敗之象也聞惡氣者必有殄穢之事急更沐浴燒香掃除寢室此是帝君戒勸於人也若聞血氣者及无故見聚血者兵凶也急道人聞急守三元帝君求救自藏齋三月禍方止也此皆是帝君先告人吉凶以令懼畏戒其禍耳夫見凶惡當行陰德普施惠救為人所不能為免乎必死之兆也子勗之勿犯守常而已

修道得真天差玉女來護也於人有記即  
道者鼻頭以玉為記也其鼻上如黍米一顆  
白如玉也

未食呪

凡道士臨於盛饌皆正心存一心想一先飲  
食然後兆乃食食之畢心微呪曰  
百穀入胃與神合氣填補血液尸邪亡墜飛  
登金闕長坐天地役使六丁靈童奉衛真氣  
來前邪氣遠退

道士三時食飯呪出北帝經

瓊漿玉液北帝降來王母親示玉童捧盃五  
藏受正真之氣雙眸朗耀一顧百神變作塵  
埃敢有當我太上滅摧急急如律令

齋見不祥之物解法出四四方經

道士齋入室有不祥之物者常行北帝呪南  
向叩齒三十六下呪曰

二象迴傾玄一之精七靈護命上詣三清雙  
皇驅除赫奕羅兵三十萬人侍衛神營巨獸  
百萬威攝千精揮劍逐邪敵落魔靈神伯所  
呪千秋滅形畢又叩齒三十六通

行道見死屍法出精要經

紫書訣云凡上學之士遊行忽見死屍穢物  
氣于身者兆當行二十四步止北向叩齒九  
通男屍思玉童三人女屍思玉女七人來請  
兆身玉谷之中皇芝素水以灌死屍之上斯  
須存死人屍化成人便陰呪曰

已枯復榮已滅復生得上天更稟太靈九  
天之劫反復胎嬰穢累盡滅白屍返生以手  
拭目二七過止如此穢氣即解死人更受化  
後為靈人兆過二十四過行鍊呪畢功滿得  
加名標上清二十四年克昇素虛輪飛行九  
玄也

道士既見死屍上經解殮法出四四方經

凡道士見死屍血穢之物當以硃砂一銖散  
內水中以洗目漱口洗手足畢入室正寢交  
手心上叩齒二十四通呪曰

三元上道太一護形司命公子五神黃寧血  
尸散滅穢流零七液纏注五藏華生令我  
神仙長享利貞畢閉目逆氣良久覺熱為候  
竟又叩齒二七通咽液三七過此三元解穢

內法

練稅死屍法出青要紫書

紫書訣云凡修上清之道兆身父母伯叔兄  
弟於世上死亡兆身未得絕跡故在人中身  
履死殮者三日當取清水一盆真朱一兩投  
水中兆於中庭南向臨水上叩齒九通呪曰  
氣化成神尸變入玄三化五練昇入九天九  
天之劫更度甲身甲身更化得為真人男屍  
思玉童三人女屍思玉女七人盆盛水以灌  
死人取水自洗手面仰天噴嚏又陰呪曰

天氣已清人化已生得上天九變受形五  
昔三塗斷落死名超度窮魂還向帝庭如此  
七人更受化生於九天之上九年得昇玉清  
之宮其法妙於大洞度七祖之法玉帝所秘  
不傳非真有金名帝圖錄字紫文得見此文  
勿輕施用妄傳於人七祖父母長閉鬼官三  
塗五苦萬劫不原四極明科七百年有真者  
聽傳

修行呪詛訣

夫身者神之宅神者身之器若不安宅以全

道修身以養神則精氣為物遊魂為變以成萬類宜常拘呪矣故須存乎守一神器研精道心則衆神備矣邪氣去矣太上寶神經曰每日早起早起每至雞鳴時也平坐東向王或春夏東南秋冬西北任所宜先以兩手摩拭面目次將兩手第二第三指於眼下橫手摩三七遍次將左手中指從眉逆拓上至髮際三七遍此名為手朝三元次將兩手二指三指各摩眼後醫中三七遍此名為真人榮瑩府又將左手第二第三指入鼻孔中摩三七過名為開山源又將兩手持耳卑叩齒三十六通微呪曰

太上四明九門發精耳目玄徹通真達靈天中之臺流氣調平驕女雲儀眼瞳英明華聰晃朗百度眇清保和上元徘徊九成五藏植根耳目自生天臺鬱素梁柱不傾七魄澡鍊三魂安寧赤子攜景遙與我并有敢掩我耳目太上當摧以流鈴萬光消滅所願必成日月守門心藏五星真皇所呪群鶴敬聽此名真人常居之道故真誥曰子欲夜寫書先當

修常居也修天真且暮咽液三九過以手舉急按天真天真在眉內角者也山源在鼻下人中入谷裏也華庭在兩眉下口中是也各三九過按而呪曰

開通天庭使我長生徹視萬里魂魄返嬰滅鬼却魔來致千靈上昇太上與日合并得補真人列象玄名此道令人致靈徹視杜遏萬裏如此亦可以次按亦可一時俱按行呪之

道士被天魔所試即誦拂魔呪出清魔經

先存思頭上圓光如日左朱鳳右玄武紫霞之蓋光明身形仙童玉女執五色之節從三界萬神前嘯九鳳後鳴八鸞白帝啓道太極參軒叩左齒三十六通叩右齒二十四通叩天鼓十二通微呪曰

羅天毒獸備巨四門吞流割膽山醜萬群張喉攫天猛衛高聲毒龍奮爪金頭橫吞威兵巨萬受符接山六天不恟合玉成群妖魔波伴穢氣紛紛謠歌空洞禮帝障雲水鬼賈形當人生門神王所告無幽不聞上攝六氣下檢河源五嶽四瀆善惡速分萬萬千千來對

我前五帝校錄有功者原凶魔千群志形帝君敢不從命所誅無錫屠割剝腹斬首滅根北鑊濱湯南陵火焚金真錄氣流鈴捕魂妖蕪無遺極盡形元身佩天書宣行正文滌蕩九氣清明三元女舉天真上合自然莫有干試改動上聞引氣十二咽止

玉帝衛靈呪鬼上法出清魔經

玉帝呪曰

九天有命上告玉清促召千真俱會帝庭太一下觀雙皇翼形監察萬邪理氣攝生若有一不祥干試神明清帝之道整勅神兵七神秉鉞天鋒右征揮劍前驅煥擲火鈴檄命甲騎武卒天丁風火齊戰伐邪狡精上威六天下攝魔靈既威既攝萬凶滅形神戈電掃茲秋無生仙皇秉節有命敢停拒節違令是誅汝形各驚各慎保茲皇寧九天告命萬神敬聽急急如律令

若夜恐怖夢相魔鬼試人干犯真氣欲病者急念此呪心存至道求請於帝乃向北叩齒三十六通閉氣密念前呪畢又叩齒三十

六通咽液十過於是百惡魔邪伏滅七神纏綿太一監攝萬靈衛真亦可日日誦卧寢念之以塞百邪也

治急病法

凡受三五法在存識三天真名三師真名有急災困病三大喚天名密呼三師名即災病皆消

上清微天真名防中

中禹餘天真名元

下大赤天真名德丘

右三天真名也

左無上真名亥

右玄老真名亥

中央太上真名亥

右三師名

反舌塞喉法

凡守一者身神常安若體中不寧當反舌塞喉救渴醴泉滿口燕之訖又如前嚙液無數覺寧乃止上而未寧重復為之須臾之間不寧之病即應廓散自然除也當時有劫覺體

中寬軟都平便以道速復常太極衆真太虛真人南嶽赤君妙行真人莫不修此以成聖真矣

金仙內法

金仙內法感降靈輿常以月五日夜半子時存日鳥從兆口入住在心中使光照一心一心之內與日同光共相合會赫赫炯炯當覺心暖霞暉映暖良久有驗乃密祝曰

大明育精內練丹心光暉合映神真來尋舉

燕液九過叩齒九通上到十五日二十五日

二十九日復作如前一月之中四度如上使人開明聰察百關解通萬神洞徹面有玉光

體有金澤行之十五年太一遣寶車來迎上登太霄遊宴紫極行之務欲數不必一月四辰也

雲笈七籤卷之四十七

雲笈七籤卷之四十八

攝八

秘要訣法行持首要

老君明照法敘事考法附

老君曰金水內景以陰發陽能為此道分身散形以一為萬立成六軍千億里外呼吸往還乘雲履水出入無間天神地祇邪鬼老魁隱蔽之類皆可見也審其精思逆見方來子能守之為仙王也

老君曰欲行明鏡勿入喪家產乳之中精澄萬慮沐浴五香當飲蘭桂之液无食葷辛之物絕棄腥臊无近婦人於寤靖之地幽室之中不聞車馬之聲金鼓之音鳥獸嚙噪乃可為之此道之忌莫甚於驚一往不復反一敗不復成也當其時心不欲復有所存耳不欲復有所聽注心正目彷彿想念至精不怠乃可成矣

老君曰當得明鏡九寸無令面有偏缺毀漬疵瑕務欲清明周正不失人容色者昔昔我先師以尺二寸鏡前後左右一焉名曰四規